

Kontuola

ANTZUOLA / Egubakoitza / 2003ko azaroaren 28a / 180. zenbakia

KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com • Lege gordailua: SS1179/02

Talleres Antzuola eta Txorikua botako dituzte Buztinzuriko lanak direla eta

ENEIDA ITURBE

Buztinzuriko urbanizazio lanak Gabon osterako amaituta egongo direla uste du Udalak. Talleres Antzuola zegoen eraikina eraitsi egingo dute. Lan hori kalea itxita dagoen bitartean egiteko eskatu dio Udalak horren ardura duen enpresa eraikitzaileari.

Buztinzuri kaleko urbanizazio lanak bizkor egiten ari dira eta Udalak espero baino lehenago amaituko dituzte. Izan ere, 2004. urte hasierarako egongo dira bukatuta. Horrekin batera, Talleres Antzuola eta Txorikua bota egingo dituzte.

Talleres Antzuola botatzeko asmoa dagoenez, lan hori Buztinzuri itxita dagoen bitartean egiteko eskatu dio Udalak eraikinaren jabe den enpresa eraikitzaileari. Orain erausten ez bada, hori egiterakoan segurtasun neurri handiak hartu beharko direla dio Udalak, eta ez dago kalea berriz itxeko prest.

SAGASTI ETA KALEGOI LOTU

Txorikua etxea ere eraitsiko dute. Horrela, Kalegoi eta Sagasti elkartuko dituen errepidea egingo dute.



Talleres Antzuola Buztinzuriko lanak bukatu baino lehen botatzeko eskatu dio Udalak enpresa eraikitzaileari.

Erabaki hori aspaldi hartu zuen Udalak, baina akordioa egitea falta zen. Oraindik hainbat puntu zehaztu barik dauden arren, Buztinzuriko lanak amaitzen dituztenarako Txorikua bota nahi du Udalak.

Herri barruko zirkulazioa guztiz aldatuko da lan horiek amaitzean. Orain itxita dagoen zatia autoendako noranzko bakarrekoa izango da. Gainera, asteburuetan oinezkoendako bakarrik zabaldu nahi ditu Udalak

Herriko Plaza eta Buztinzuri. Horrekin, oinezkoei emango zaie lehenetsia eta autoek Sagastitik ibili beharko dute. Hala ere, plazan eta Buztinzurin bizi direnek izango dute autoak atera eta sartzeko aukera.

HERRITARREN HITZA / Mikel Larrea • Udaleko idazkaria

Elkarteen gaixotasuna

Aspaldidanik esan ohi dugu hainbat kultur, kirol edota giza elkarte desagertzeko arriskuan daudela. Jendeak ez du konpromisorik hartu nahi eta nahiago du erosotasuna, honela kritika eta ikusezinak saihestuz.

Antzuolako kultur elkarteek "gutxieneko zerbitzuak" betetzen dituzte. Kirol elkarteek ez dute desgitearen mamua desagerraraztea lortzen. Giza mugimenduek herria kontzientziatzeko formula berriak aurkitzeko beharra izaten dute. Eta elkarte politikoek asko sufritzen dute hauteskundetarako listak osatzeko orduan.

Gizabanakoak, bere partaidetza eta erantzukizunaren arabera, lau jarrera hauetako bat hartzen du: Arduragabea: ez du ezertan parte hartzen (zoritarrez gehien goak dira). Begiralea: leialki joaten da deitutako deialdiatara, baina bere partaidetza ekintzetara joatea besterik ez da. Partehartzaile: zentzu guztietan laguntza emateko prest azaltzen da; oso borondate onekoa, baina



"Antzuolako elkarteek 'gutxiengo zerbitzuak' betetzen dituzte"

ekitaldiatara, baina joatea erabaki nuen. Arduragabea izatetik begiralea izatera pasa

liderraren mendetasun handia du. Liderra: lehendakaria izaten da, garatu behar diren ekintzetan erantzukizun guztia duena.

"Behin, etxean nengoela, aste kultural baten foiletora heldu zitzaidan eskuetara. Erakargarria zirudien egitarauak. Inoiz joan gabea nintzen halako

nintzen. Denborarekin, deitzen ziren ekitaldi guztietara joaten nintzen, eta antolatzaileek laguntza eskatu zidaten. Poliki-poliki antolaketa lanetan hasi nintzen. Urteak pasa ahala, ez dakit nola, baina elkarteke lehendakari nintzen. Nire buruari ondorengoa galdetu nion orduan: Nola demontre heldu naiz honaino?"

Helburua arduragabeak etxetik ateratzea da. Haietako batek zure deialdiari erantzuten badio, ahaleginak merezi izan duen seinale. Hauek dira etorkizunean elkarteen jarraipena bermatuko dutenak.

Oraindik denboraz gaude.

LABUR

Bertso musikatuena saioa eskainiko dute domekan

Bertso musikatuak entzuteko aukera izango da domekan, arratsaldeko 18:30ean, Orlanen. Arantxa Cruz eta Joseba Ramirezek bertso zahar zein berriak abestuko dituzte, gitarra eta pianoaren laguntzarekin. Musika eta kantuaz gain, diaporamak, esketxak eta dantzak ere eskaintzen ditu ikuskizun honek. *Xalbadorren heriotzean* eta *Mundurats eman ninduzun* dira kantatuko dituzten bertsoetako batzuk.

Kongoko argazkien erakusketa egongo da Orlanen

Anelkarrek Kongoko Kanzenia lurraldera laguntza bidaltzeko kanpaina jarri du abian. Antzuolarrak Kanzeniak biztanleek bizi duten egoeraz jabe daitezten argazki erakusketa egongo da Orlanen asteburu honetan eta hurrengoan. Kongon izan diren antzuolarrak -Bittor eta Andres Arbuluk eta Jone Letek- egindako argazkiak egongo dira ikusgai, zapatuetan 18:30etik 20:00etara eta domeketan 12:00etatik 14:00etara eta 18:30etik 20:00etara.

Emakumeen aurkako indarkeria salatu zuten

Pasa den martitzenean, azaroak 25, Emakumeen Aurkako Indarkeria Desagerrarazteko Nazioarteko Eguna izan zen. Antzuolarrak ere emakumeek jasaten duten indarkeria salatu nahi izan zuten. Hain zuzen ere, kale bilkura egin zuten Herriko Plazan, arratsaldeko 19:00etan. Udaltzeko balkoian lazo zuria jarri zuten egun hori zela-eta. Martitzena aurretik herritarren artean jertsean zintzilikatzeko lazoak banatu zituzten, martitzenean soinean eramateko.

ELKARRIZKETA

JOSE FRANCISCO AMIAMA/PSIKOPEDAGOGOA

"Familia batean guztiek parte hartu behar dute eta erantzukizuna izan"

Martitzenean, abenduak 2, Familia ardurakizuna: nola bultzatu kooperazioa eta arduraren seme-alabengan programa aurkeztuko dute Eskolan. Programa honen helburua guraso talde bat sortu eta familia ardurakizunaren inguruko ikastaroa egitea da. Isabel Bartau programaren sortzaile eta bultzatzaileak eta Jose Francisco Amiama saioak zuzenduko dituen psikopedagogak egingo dute hitzaldia.

Zertan datza aurkeztuko dituzuen programa?


Isabel Bartauk eta Juana Magantok egindako ikerketa batean oinarritzen da programa. Familia ardurakizuna landu dute eurek, eta orain, Gipuzkoako hogeit hamar herrian gurasoak gai horren inguruan prestatzeko eskolak antolatuko ditugu. Antzuolan guraso taldea sortuz gero, nik zuzenduko ditut saioak. Programa oso berria da, baina guraso eskoletako dinamika dauka eta honetan gero eta esperientzia handiagoa dago.

Zer da familia ardurakizuna?

Ardurakizuna erantzukizuna da, baina etxeko guztiok izanda erantzukizuna. Programa horrek bi puntu interesgarri ditu: kooperazioa eta ardura. Familia baten denok parte hartu behar dugu. Garai baten aitak agintzen zuten eta besteek, hark esandakoa egin. Egun, beste era batean ulertzen dugu hori. Lehen, esanekoa izatea zen garrantzitsua. Orain, trintxo izate hori ez da nahikoa; ardura eta autonomia izan behar dute umeeak. Gurasook dinamika berri batera ohitu behar dugu. Horregatik gero eta garrantzitsuagoak dira guraso eskolak.

Nolako izango da saio bat?

Astean behin bi orduko saioa izango dugu. Parte hartzeak izango dira horiek; izan ere, hausnarketak izango du garrantzia. Irakurtzeko materiala dago saioa



Orain trintxo izatea ez da nahikoa; ardura eta autonomia izan behar dute umeeak

nondik norakoa izango den jakiteko, baina gero, taldean horretaz hitz egiten da. Ariketen bidez, praktikan jarriko ditugu esandakoak. Helburua han ikasitako estrategiak etxera eraman eta probatzea izango da. **Saioak zein hizkuntzatan**

Saioak parte hartzeak izango dira; hausnarketak izango du garrantzia

egingo dituzu? Taldearen arabera erabakiko da hori. Guztiek euskaraz badakite, euskaraz egingo ditugu. **Zer esango zieneke gurasoei saioetarako zientzia emateko?** Atsegina izango dela eta gogoeta egiteko balioko diela.

KIROLA

Arrolak Antzuola ezagutzeko mendi irteera egingo du

Antzulako inguruak ezagutzeko irteera egingo du Arrolak domeka honetan. Ibilbidea Herriko Plazan hasiko dute eta Aristiberrira joango dira; handik Misora igoko dira. Rancho Alegren egingo dute hamarretakoa eta horren ondoren Landatxotik behera itzuliko dira.

Parte hartzeke ez dago izena eman beharrik; joan nahi duen guztiak goizeko 09:00etan Herriko Plazan egon beharko du. Berez, aurreko astebururako pentsatua zuten irteera hori, baina atzeratu egin dute.

PARTIDUAK

FUTBOLA

Azaroak 29
12:00: Antzuola-Bergara (Kadeteak)

PILOTA

Azaroak 29
17:00: Olalde-Illunpe 1 (eskuz nag.)

EMAITZAK

FUTBOLA

Antz. 1 Aurrera Ondarroa 1 (2. erre.)

PILOTA

Gipuzkoako txapelketa
Murumendi-Olalde (eskuz nag.) 19-22
Olalde-Elordi herrigintza (kadet.) 22-11
Olalde-Urrietako (paletaz nag.) 35-16

EHIZA


Toledo, Euskadiko Oilagor Txapelketan

ENEIDA ITURBE

Iñaki Toledo antzuolarrak Euskadiko Oilagor Txapelketan parte hartuko du domeka honetan Leitzarango ibarrean. Gipuzkoako txapelketan garaile izan zen eta hala lortu zuen besterako txartela. Hamar aurkari izango ditu: lau gipuzkoar, hiru bizkaitar eta beste horrenbeste arabar. Txapelketetan esperientzia han-

dikoa da Iñaki; izan ere, azken urteetan Gipuzkoa, Euskadi eta Estatu mailakoetan izan da. Betiere, *Moon* txakurrak lagunduta.

Ehiza denbora-pasa baino gehiago da Iñakirendako. Azarotik urtarrila bitartean, astean gutxienez lau egunean egiten du ehizan. Nafarroa, Trebiño eta Huescako mendiak gustatzen zaizkio horretarako, baina Antzuolan ere aritzen da.



Iñaki Toledok Euskadiko Oilagor Txapelketan parte hartuko du domekan.



Jose Luis Zabalo

Kalegoi 9, 1. solairua
ANTZUOLA.
Tel. 943 76 60 89
Faxa: 943 76 60 14

ZAHAR BERRITZEAK:
Fatxadak
Bainugela eta sukaldea
Lokal komertzialak
Teilatuak

**Eta orain....
GREMIOEN
KOORDINAZIOA**

LARREA

TABERNA

Kalebarren 17
ANTZUOLA

Juan Cruz

ARGAZKIAK

Ezkontza erreportaiak
Jaunartze erreportaiak
Momentuko argazkiak
Estudioko argazkiak

BITXITEGIA

Marrokineria
Erlajuak, Bitxiak
Opari gaiak

Herriko plaza 4. Tel. 943 78 70 66. ANTZUOLA